

Na osnovu člana 13. Zakona o principima lokalne samouprave u Federaciji Bosne i Hercegovine („Sl. novine FBiH“, broj 49/06 i 51/09) a u vezi sa Odlukom o proglašenju stanja nesreće uzrokovano pojavom koronavirusa (COVID-19) na području Federacije BiH, V. Broj: 408/2020 od 16.03.2020. godine i člana 6. Statutarne Odluke o organizaciji Grada Tuzla, u vezi sa Zakonom o Gradu Tuzla („Službeni glasnik Grada Tuzla“, broj 1/14, 3/15, 7/15 i 12/15), Gradsko vijeće Tuzla na sjednici od 29. maja 2020. godine, donosi

## **PRAVILNIK**

### **za dodjelu jednokratnih novčanih pomoći za lica kojima je prestao radni odnos u vrijeme trajanja stanja nesreće uzrokovano pandemijom koronavirusa COVID 19**

#### **I - OPĆE ODREDBE**

##### **Član 1.**

- (1) Ovim Pravilnikom utvrđuju se kriteriji i način raspodjele finansijskih sredstava iz Budžeta Grada Tuzle namijenjenih za dodjelu jednokratnih novčanih pomoći u cilju saniranja posljedica stanja nesreće uzrokovano pandemijom koronavirusa COVID 19.
- (2) Novčana sredstva u jednokratnom iznosu dodjeljuju se s ciljem pomoći stanovnicima grada Tuzle koji su se našli u stanju socijalne potrebe zbog prestanka radnog odnosa za vrijeme stanja nesreće uzrokovano pandemijom koronavirusa.

#### **II - KRITERIJI ZA RASPODJELU SREDSTAVA**

##### **Član 2.**

Pravo učešća u raspodjeli sredstava, iz člana 1. ovog Pravilnika, imaju osobe kojima je prestao radni odnos u vrijeme trajanja stanja nesreće uzrokovano pandemijom koronavirusa a koje ispunjavaju sljedeće kriterije:

- a) da je podnosilac zahtjeva na dan proglašenja stanja nesreće uzrokovano pandemijom koronavirusa na području Federacije BiH (16.3.2020. godine) imao prijavljeno prebivalište na području grada Tuzle,
- b) da je podnosiocu zahtjeva utvrđen prestanak radnog odnosa za vrijeme trajanja stanja nesreće,
- c) da primanja po članu porodičnog domaćinstva podnosioca zahtjeva ne prelaze iznos od 25% prosječne neto plaće ostvarene u Federaciji Bosne i Hercegovine u mjesecu prije proglašenja stanja nesreće,
- d) da se podnosilac zahtjeva nalazi na evidenciji nezaposlenih lica.

#### **III - POSTUPAK DODJELE SREDSTAVA**

##### **Član 3.**

- (1) Sredstva iz člana 1. ovog Pravilnika dodjeljuju se putem javnog poziva koji objavljuje služba nadležna za oblast socijalne zaštite (u daljem tekstu: nadležna Služba).
- (2) Javni poziv objavljuje se na oglasnoj ploči i zvaničnoj internet stranici Grada Tuzle (grad.tuzla.ba) te na oglasnim pločama mjesnih zajednica grada Tuzle i ostaje otvoren do utroška planiranih sredstava.
- (3) Zahtjev za dodjelu jednokratne novčane pomoći iz člana 1. ovog Pravilnika podnosi se na prijavnom obrascu čiji sadržaj propisuje nadležna Služba i objavljuje uz javni poziv.
- (4) Zahtjeve će rješavati nadležna Služba po redoslijedu podnošenja.
- (5) Nadležna Služba dužna je riješiti zahtjev u roku od 30 dana od dana podnošenja istog i o tome obavijestiti podnosioca.

##### **Član 4.**

U postupku prijave na javni poziv podnosioci su dužni uz popunjen prijavni obrazac dostaviti sljedeću dokumentaciju:

1. prijavu o evidenciji prebivališta (PBA 1 obrazac) za podnosioca zahtjeva, ne stariju od 60 dana (fotokopija)
2. izjavu o članovima zajedničkog porodičnog domaćinstva - Kućna lista ovjerena kod nadležnog organa, ne stariju od 60 dana (original ili ovjerena fotokopija)
3. dokaz da je podnosiocu zahtjeva prestao radni odnos za vrijeme trajanja stanja nesreće (rješenje, odluka ili drugi pravni akt poslodavca),
4. uvjerenje da se podnosilac zahtjeva nalazi na evidenciji nezaposlenih lica JU Služba za zapošljavanje Tuzlanskog kantona – Biro Tuzla (original ili ovjerena fotokopija)
5. dokaz o radno-pravnom statusu za punoljetne članove zajedničkog porodičnog domaćinstva ne stariji od 30 dana:
  - a) za nezaposlena lica – uvjerenje izdato od strane JU Služba za zapošljavanje Tuzlanskog kantona ili dokument izdat od strane Porezne uprave FBiH – Poreska ispostava Tuzla iz kojeg je moguće utvrditi činjenicu da lice ne ostvaruje primanja po osnovu radnog odnosa (original ili ovjerena fotokopija),
  - b) za zaposlena lica – dokaz o visini plaće/platna lista (original ili ovjerena fotokopija),
  - c) za penzionere - ček od penzije (fotokopija) i
  - d) za lica koja su navršila 65 godina, a nisu ostvarila pravo na penziju - uvjerenje da lice nije ostvarilo pravo na penziju izdato od strane Federalnog zavoda PIO/MIO ili dokument izdat od strane Porezne uprave FBiH – Poreska ispostava Tuzla iz kojeg je moguće utvrditi činjenicu da lice ne ostvaruje primanja po osnovu prava na penziju (original ili ovjerena fotokopija),
6. tekući račun podnosioca zahtjeva (fotokopija).

#### **Član 5.**

- (1) Jednokratna novčana pomoć isplaćuje se u iznosu od 300 KM za podnosioca zahtjeva čije porodično domaćinstvo broji do tri člana i 500 KM za podnosioca zahtjeva čije porodično domaćinstvo broji preko tri člana.
- (2) Podnosioci zahtjeva mogu jednom u toku godine ostvariti pravo na jednokratnu noćanu pomoć putem javnog poziva.
- (3) Izuzetno od stava (2) ovog člana, ukoliko Služba nakon provedenih postupaka po javnom pozivu utvrdi da nisu utrošena sva sredstva predviđena za ove namjene, jednokratna novčana pomoć može se dodijeliti i drugi put aplikantima kod kojih je utvrđen veći stepen socijalne potrebe u odnosu na druge (primanja domaćinstva, broj članova domaćinstva i sl.) pod uvjetom da se i dalje nalaze na evidenciji nezaposlenih lica.

#### **Član 6.**

- (1) Postupak po zahtjevima za ostvarivanje prava na jednokratnu novčanu pomoć će provoditi nadležna Služba u skladu s odredbama Zakona o upravnom postupku (“Službene novine Federacije Bosne i Hercegovine“, broj: 2/98 i 48/99).
- (2) Isplata odobrene jednokratne novčane pomoći vršit će se putem Službe za budžet i finansije uplatom na tekući račun podnosioca zahtjeva.

### **IV - ZAVRŠNE ODREDBE**

#### **Član 7.**

Ovaj Pravilnik stupa na snagu narednog dana od dana objavljivanja u „Službenom glasniku Grada Tuzle“.

**GRAD TUZLA**  
**GRADSKO VIJEĆE**  
**Broj: 01/31-A-6078-2020**  
**Tuzla, 29. maj 2020. godine**

**PREDSJEDAVALA**  
**Nataša Perić, prof.**